

ROTA

ROTA 1

Iniogalin i Ilimilik so Pamiliya niyan sa Mowab

Sii ko manga gawii a so manga pangongokom na aya ndadato sa Israil na tiyaon so inged. Na aden a sakataw a mama a taga Bitlihim sa Yodah a somiyong sa inged a Mowab a ped iyan so karoma niyan ago so dow a wata iyan a mama ka tereg siran roo.

2 Aya ngaran o mama na si Ilimilik, na so karoma niyan na si Naomi, na aya manga ngaran o dow a wata iyan na si Malon ago si Kiliyon. Ped siran ko mbawataan o Iprat a manga taga Bitlihim sa Yodah. Sii ko katatareg iran roo

3 Na miyatay si Ilimilik a karoma i Naomi na minibegak si Naoma ago so dow a wata iyan a mama.

4 Miyamakapangaroma siran sa manga babay a taga Mowab a aya ngaran o isa on na si Orpah, na so isa on na si Rota. Kagiya makapaginged siran roo ko miyakasapolo ragon

5 Na miyatay mambo si Malon ago si Kiliyon na si bo si Naomi i miyalamba a da a karoma niyan o di na wata.

Komiyasoy si Naomi ago si Rota sa Bitlihim

6 Da paman matey na miyaneg i Naomi roo sa inged a Mowab a kiyarakmatan o Allah so manga pagtaw niyan sa Yodah ko kiyapakaodara niyan kiran ko pepanga raragon. Sabap roo na mitiyagar siran ago so dow a miyamakamong on a babay sa kapagawa iran sa Mowab ka kesoy siran sa Yodah.

7 Na giyanatan iran so darpa a babalingan iran sa kapelalag iran ko lalan a ipesong sa inged a Yodah.

8 Ogaid na pitero i Naomi ko miyamakamong on a "Kasoy kano bo sii ko manga walay o manga ina iyo, na pengnin ko a ikalimo kano o Allah a datar o kinikalimoon iyo ko miyamatay a karoma niyo ago saken.

9 Mapero o Allah ko oman i isa rekano a mapangaroma kano peroman a makabangon kano sa walay."

Na inarekan siran i Naomi. Ogaid na miyakaotantang siran sebenar

10 A tig iran a "Di! Magonot kami reka roo ko manga tonganay ngka."

11 Ogaid na tig i Naomi a "Kasoy kano, manga wata aken. Ino kano raken pegonot? Ba ako pen makambawata sa manga mama a makapangaroma rekano?"

12 Kasoy kano ko manga walay o manga lokes iyo, manga wata aken, ka miyalokes ako den a di den mapangaroma peroman. Na apiya pen o kepakay a mapangaroma ako imanto a kagagawii a mbawata sa manga mama

13 Na ba niyo siran kenayawi taman ko kapakala iran a di kano den pakipangaroma ko ped a manga mama? Kena, manga wata aken. Tiyanan ako o Allah sa morka na tanto a mararata a ginawa ko sabap rekano."

14 Na gomiyoraok siran peroman na inarekan i Orpah si panogangan iyan sa kapagodas iyan on. Ogaid na si Rota na domiyareket rekaniyan.

15 Na pitero i Naomi ki Rota a "Ilaya ngka man, ka kesoy so idas ka roo ko manga tonganay niyan ago sii ko manga tohan iyan. Na, onot ka rekaniyan maling."

16 Ogaid na somimbag si Rota a "Di ako ngka petegela mangimbelag reka! Di aken seka den pagawaan. Apiya anda ka song na song ako ron mambo, na apiya anda ka keden na ron ako mambo keden. So manga tonganay ngka na kebaloy mambo a manga tonganay aken, na so Tohan ka na kebaloy a Tohan aken.

17 Apiya anda ka petay na ron ako mambo petay, na ron ako pen kilebeng. Kamorkaan ako o Allah sa tanto a maregen o aden a kambelagan ta a liyo ron so kapatay!"

18 Na so kiyailaya i Naomi a mananabenar si Rota sa kapakaonot iyan on na ginakan iyan somapar.

19 Mandiyadi na tomiyaros siran a dow a ko kapelalakaw iran taman sa minisampay sa Bitlihim. Kiyasasalakawan so langon a magiinged on ko kiyapakaoma iran, na pitero iran a "Ba giyai si Naomi?"

20 "Di ako niyo pembetowi sa Naomi," a tig iyan kiran. Betowi ako niyo sa Mara ka tanto a piyakapait o Lebi a Mabager a Tohan so kapepaginetaw aken.

21 Sii ko kiyaganat aken sii na mapepeno ako, ogaid na piyakabaling ako o Allah a da a tago iyan. Ino ako niyo pembetowi sa Naomi a riyomasay ako ago pimorkaan o Lebi a Mabager?"

22 Giyanan i kiyapakakasoy i Naomi a poon sa Mowab a ped iyan so miyakamong on a si Rota a taga Mowab. Na miyakaoma siran sa Bitlihim ko kiyapooni ko kaperaragon sa bantad.

ROTA 2

Minggalebek si Rota ko dii Mbabasokan i Bowas

Aden a tonganay i Naomi a aya ngaran iyan na si Bowas, a mala i gees ago pakaalaan a mama a ped ko pamilya i Ilimilik a karoma i Naomi.

2 Miyakaisa a gawii na pitero i Rota ki Naomi a "Pakasonga ko ngka ko dii mbabasokan kaan ako ron makapamodiyot sa manga pereperan a pekibegak o apiya antawaa a dii meragon a peparo raken." Na tig i Naomi a "Ika roo den, wata ko."

3 Na somiyong si Rota ko dii mbabasokan na miyamodiyot ko pekeiposan o dii meraragon sa bantad. Na miyasalak a giyangkai a dii mbabasokan na rek i Bowas a tonganay i Ilimilik.

4 So katatago roo i Rota na miyakaoma si Bowas a poon sa Bitlihim, na siyalam iyan so dii meraragon a "Malalayon rekano so Allah!"
"Karakmatan ka o Allah!" a inisembag iran.

5 Na inisean i Bowas so kapatasa ko dii meraragon a "Antawaa angkoto a kangodaan a babay?"

6 Somimbag so kapatas a "Giyoto so babay a taga Mowab a miyonot ki Naomi ko kiyakasoy niyan sii a poon sa inged a Mowab.

7 Piyangni niyan raken o ba makapamodiyot ago makapanimo sa pereperan ko pekeiposan o dii meraragon. Miyakaoma sekaniyan ko kapipita na minggalebek taman imanto liyo ron igira a pendeke sa di matey sii ko kasisirongan."

8 Mandiyadi na pitero i Bowas ki Rota a "Pamakineg ka, wata aken. O ba ka sii awa sa kapemodiyot sii ko ped a dii mbabasokan. Sii ka den a ped o kigagalebek aken a babay.

9 Pegilaya ngka so darpa a di iran dii nggalebekan na tondoga ngka siran. Inipamando aken ko manga ngongoda a mama a di ka iran pekebota. Na igira a pekewaw ka na song ka ko manga omoy na inom ka on ko ig a siyageb iran."

10 Na romiyoko si Rota a iniseko iyan a paras iyan ko lopa a pitero iyan ki Bowas a "Ino ako ngka kelimoon ko kiyatagoa ngka raken sa ginawa a matag ako mananangga?"

11 Somimbag si Bowas a "Miyapanotol raken so langon a pinggolaola ngka a kamapiyaan o panogangan ka ipoon ko kiyapatay o karoma ngka. Katawan aken a inawaan ka so ama ago so ina a ka ago so inged a pimbawataan reka na sii ka miyaling ko manga taw a di ngka katawan gowani.

12 Pengnin ko ko Allah a ibedal iyan reka so pinggolaola ngka. Kabalasan ka piyapiya o Allah a Tohan o Israil a ron ka miyagapas ko didalem o manga papak iyan!"

13 "Tanto ako ngka a inikalimo, kadnan ko," a tig i Rota. "Piyakapiya ngka a ginawa ko ko kala a ka i gagaw ko kinimbitiyarain ka raken a oripen ka apiya pen kena ako a ba lagid o isa ko manga gomagalebek ka a babay."

14 Na sii ko kaken na pitero rekaniyan i Bowas a "Song ka sii na go ka kan sa paan na diloten ka ko arak." Na miyontod si Rota ko obay o dii meraragon na bigan i Bowas sa sindag a bantad. Komiyon sekaniyan na miyaosog na miyawid pen ko miyasama iyan.

15 Kagiya komasoy sekaniyan ko dii nggalebekan na piyamando i Bowas so manga gomagalebek iyan a tig iyan a "Apiya pen o mangowa sekaniyan ko pepamangeto a pereperan na di niyo separi.

16 Na tibabaa niyo a kapekeolog o ped ko manga saway na pembegaken iyo ron a mapemodiyot iyan, na di niyo sekaniyan pembongeti."

17 Na giyoto a miyamodiyot si Rota sii ko dii mbabasokan taman ko kiyagabi niyan.

Oriyan iyan na inegik iyan so miyapanimo iyan, na manga sapolo ini ka kilo a bantad.

18 Inawidan iyan ai na miyaling ko siti na piyakiilay niyan ko panogangan iyan so kala a miyatimo iyan. Inibegay ron pen i Rota so miyasama ko miyakan iyan.

19 Na iniise on i Naomi a "Anda ngka miyapamodiyot angkai a langon a pereperan imanto a gawii! Anta kilopa i piyamodiyotan ka? Karakmatan so mama a tomiyago reka sa ginawa!"

Pitero i Rota ko panogangan iyan so makapantag ko mama a kirek ko dii mbabasokan a piyamodiyotan iyan a tig iyan a "Aya ngaran iyan na si Bowas."

20 "Karakmatan sekaniyan o Allah!" a tig i Naomi ko miyakamong on. "Da den geneken o Allah so kipekelimoon iyan ko manga ooyagoyag ago so miyamatay!" Na tig iyan pen a "Giyangkoto a mama na madaseg tano a tonganay a isa ko aden a kabenar iyan sa kaaona ko pamiliya tano."

21 Na tig i Rota a "Pitero iyan raken pen a 'Sii ka den a ped o kigagalebek aken taman sa mapasad iran meragon so langon a pereperan aken."

22 Tig i Naomi a "Mapiya reka, wata aken, a kapegonot ka den ko kigagalebek iyan a babay ka o ba ka baden semoka sii ko ped a dii mbabasokan."

23 Sabap roo na sii den pegobay si Rota ko kigagalebek i Bowas a manga babay taman ko kiyaimasada meragon ko bantad ago trigo. Na komakaden sekaniyan den ko panogangan iyan.

ROTA 3

Si Rota ago si Bowas ko Pegagikan

Miyakaisa a gawii na pitero i Naomi ki Rota a "Wata ko, disomala a kipengilobaan aken reka sa kebalingan ka a ron ka kapepiyapiyai.

2 Katawan ka a si Bowas a minipagepeda a ka so kigagalebek iyan a babay na tonganay tano. Na, pakinega ngka; imanto a gagawii na magegik sekaniyan sa bantad roo ko peegeben.

3 Peigo ka na go ka kekamotan, na solota ngka so lebi a mapiya a nditaren ka. Na songowi ngka sekaniyan roo ko peegeben ogaid na o ba ngka on pakitokawi a ndodoo ka taman sa di sekaniyan makapasad koman ago minom.

4 Amay ka magiga sekaniyan na ilaya ngka o anda i pagigaan iyan. Na amay ka makatorog na song ka on na lekisa ngka so tanggob sii ko manga ai niyan na iga ka roo. Na peteroon iyan reka i penggolaolaan ka."

5 "Nggolaolaan ko so langon a pitero o ka," a tig i Rota.

6 Na somiyong sekaniyan ko peegeben na ininggolalan iyan so langon a iniinsarat on o panogangan iyan.

7 Sii ko kiyapakapasad koman i Bowas a miyakapiya a ginawa niyan na somiyong sekaniyan ko obay o aantiban sa pereperan na miniga ago miyakatorog. Na minanay ron mobay si Rota na likis iyan so tanggob ko manga ai niyan na miniga roo.

8 Sii ko kiyalooki sa gawii na kiyatekawan si Bowas na tomiyakilid, na miyamemesa a aden a babay a miiga ko dasigan iyan.

9 "Antawaa ka?" a iniise iyan.

"Saken si Rota a oripen ka," a tig iyan. "Sapengen ka raken so bibir o tanggob ka, ka seka na madaseg a tonganay a makaaon ko pamiliya ami."

10 Tig i Bowas a "Karakmatan ka o Allah, wata aken! Lebi a mala a kipekelimoon ka ko pamiliya ngka imanto a di so miyaona ka kagiya kena a ba aya ngka pegapasa na so manga ngongoda a mama apiya anda ko tatamoken o di na miskin.

11 Na di ka pegawid a akal imanto, wata aken. Ipenggolalan aken reka so langon a ipapaliyogat, ka so langon a taw roo ko siti na katawan iran a mapiya ka i paparangayan a babay.

12 Benar den a saken na madaseg ka a tonganay a makaaon ko pamiliya niyo ogaid na aden pen a madaseg ka a di saken.

13 Na, sii ka den ko mababasa gawii na amay ka mapita na imbitiyarai aken sekaniyan. O kabaya iyan a pagaonen ka niyan na mapiya; pekaaonen aken sekaniyan. Ogaid na o di niyan kabaya na isepa aken ko kaooyagoyag o Allah a saken i magaon reka. Na, iga ka sii taman sa mapita."

14 Na miniga si Rota ko dasigan i Bowas taman ko kiyapita iyan ogaid na mimbowat komabalaga sa di on pen kakatokawi o apiya antawaa, ka miyatero i Bowas a "Disomala a da a ba makatokaw a aden a babay a miyakasong ko pegegikan."

15 Pitero iyan pen a "Wita ngka sii so kimon a sosoloten ka na kayata ngka." Pinggolaola ini i Rota na inododan i Bowas sa nem ka asada a bantad. Na piyakiposai niyan ki Rota na miyaling sekaniyan.

16 Kagiya makaoma si Rota ko walay na inisean o panogangan iyan a "Antonaa i miyasowasowa, wata ko?"

Piyanotol on i Rota so langon taman a inikidia on i Bowas.

17 Tig iyan pen a "Inibegay niyan raken angkai a nem ka asada a bantad ka pitero iyan raken a 'Di ka mbeling ko panogangan ka sa da a awid ka.'"

18 Na pitero on i Naomi a "Ba ka den sebar, wata aken, taman sa katokawan ka i sendadan ai. Ka di den ndeke angkoto a mama taman sa mapasad iyan imanto angkai a betad."

ROTA 4

Piyangaroma i Bowas si Rota

Somiyong si Bowas ko dii timotimoan ko gimowa o siti na miyontod roo. Samaoto na somiyagad roo so madaseg a tonganay a makaaon ko pamiliya a miyaaloy i Bowas. Na tiyalowan i Bowas a "Hey pagari ko, song ka sii man na go ka ontod." Na miyobay ron na miyontod.

2 Na kominowa si Bowas sa sapolo a pelokelokesen ko siti na piyangni niyan kiran a kaontod iran roo a peseksi.

3 Na pitero i Bowas ko tonganay a makaaon ko pamiliya a "Si Naomi a gopen miyakakasoy sii a poon sa Mowab na di niyan dii pesaan so lopa a rek o tonganay tano a si Ilimilik.

4 Na miyapamikir aken a pekitokawan ko reka ini ago peteroon ko reka a pamasaa ngka ini ko kamamasaan angkai a kioontod sii ago sii ko hadapan angkai a manga pelokelokesen. O pagaona ngka na nggolaola ngka den, ogaid na o di ka kebaya na

teroa ngka raken kaan aken katokawi. Ka da den a ped a kikabemar sa kapagaona on a rowar reka, na saken i telondog reka."

"Pagaonen ko," a tig o mama.

5 Na pitero i Bowas a "Sii ko gawii a kapemasaa ngka ko lopa i Naomi na kekowa ngka pen si Rota a taga Mowab a so miyabalo o miyatay a kebaloy a karoma ngka kaan matatap so kapekewaliya ko lopa o manga mbawataan o miyatay."

6 Somimbag so madaseg a tonganay a "O giyanan na isengkop aken so kabenar aken sa kapemasaa ko lopa ka masiken a kebatalan so rek aken a kawali. Seka den i kowa ko kabenar aken ka di aken keaon."

7 Sa masa oto na giyai so adat o manga Israil sii ko kapepasai ago so kitogalinen ko manga tamok: pagendaan o dii pesa so tinilas iyan na imbegay niyan ko pemasa. Giyai i kiyapakatengkada ko dii kapenigosiyoo roo sa Israil.

8 Kagiya ka maoto na sii ko kiyagiraw o madaseg a tonganay ki Bowas a "Seka den i pamasa on," na inendaan iyan on so tinilas iyan na inibegay niyan ki Bowas.

9 Mandiyadi na pitero i Bowas ko manga pelokelokesen ago so langon a miyalimod a "Imanto a alongan na manga saksi kano sa miyapamasa ko poon ki Naomi so langon a rek i Ilimilik ago so manga wata iyan a si Kiliyon ago si Malon.

10 Liyo ron pen na miyakowa ko si Rota a bitowanen i Malon a kebaloy a karoma ko kaan sekaniyan makambawata sa pekaawid ko ngaran o miyatay a makapekewali pen ko manga rek iyan. Sangkai a okit na di keda so ngaran o miyatay ko manga tonganay niyan o di na sii ko kisosoraten on ko pimbawataan on a inged. Na manga saksi kano sii imanto a gawii."

11 Na pitero o manga pelokelokesen ago so langon a ped a malilimod roo a "Oway, manga saksi kami! Na pangnin ta ko Allah a mbalowin iyan angkai a babay a mbeling ko walay ngka a lagid o Rakila ago si Liyah a aya miyamakabangon ko langon o nasiyon a Israil! Na mabaloy ka a mala i gees san sa Ipratah ago kababantogan sii sa Bitlihim.

12 Pangnin ta a so kebabadan reka a imbegay reka o Allah a nggolalan sangkai a mangoda a babay na mabaloy a datar o kiyababadan ko Piris a inimbawata o Tamar ago so Yodah."

So Salsila ko Daod

13 Na inowit i Bowas si Rota ko walay niyan a karoma niyan. Na sii ko kapakatetapi iran na inikalimo siran o Allah na miyaogat si Rota a mimbawata sa mama.

14 Na pitero o manga babay ki Naomi a "Podin so Allah a migay reka sangkai a gawii sa madaseg a tonganay a miaon ko pamiliya ngka! Pangnin ta a mbeloy angkai a wata a kikilalaan sii sa Israil!

15 Pembagowan iyan so kaoyagoyag ka ago tegikor reka ko kiyalokes ka, ka aya on mimbawata na so miyakamong reka a pekebabaya reka a lebi reka a tomo a di so pito a wata a mama."

16 Na kinowa i Naomi so wata na inaben a rinitan iyan.

17 Na so siringan iyan a manga babay na bitowan iran so wata sa Obid a tig iran a "Aden a wata a mama a inimbawata para ki Naomi!" Na si Obid na aya ama o Yasay a aya ama o Daod.

18 Giyai i salsila ko Daod ipoon ko apoapoan iyan a so Piris:

Si Piris na ama i Hisron,

19 Si Hisron na ama i Ram, si Ram na ama i Aminadab,

20 Si Aminadab na ama i Nason, si Nason na ama i Salmon,

21 Si Salmon na ama i Bowas, si Bowas na ama i Obid,

22 Si Obid na ama i Yasay, na si Yasay na ama i Daod.